

KIFER LALIT DAN ELEKSYON ?

LALIT pe prezant kandida dan tule 20 sirkonskripsyon dan Moris. Nu pu ena omwin enn kandida dan sak sirkonskripsyon. Nu ena trwa kandida dan Sirkonskripsyon 1, 8, 11 ek 20. Ler inn vini pu vot LALIT!

LALIT prezan dan sa eleksyon pu ofer posibilite tu elekter exprim nu vot dan enn fason intelizan ek itil. Dan sa eleksyon la, LALIT tusel ena enn program ki pran kont bann vre problem ki lamas dimunn ek travayer pe fer fas. Li 64-paz. U kapav gayn kopi ar LALIT, swa lir li lor internet:

<http://www.lalitmauritius.org>.

Lezot lafors dan sa eleksyon la, kuma Lalyans MMM-PTr ek Lalyans Lepep, zot anfaver patron. Zot ena mem kalite politik ki anfaver sistem kapitalis e zot tultan pe vini

avek plan sovtaz pu sap sa sistem kapitalis ki ankriz. Dayer a diferan moman zot finn ansam dan guvernman pu inpoz zot politik ki fer klas travayer sarye fardo kriz. Zot riske revinn ansam ankor.

Enn vot pu LALIT pu reprezant enn reze a Lalyans MMM/PTr ek Lalyans Lepep.

LALIT pe osi demark nu depi tu lezot parti ki pena enn program serye pu propoze dan sa kontex kriz la.

LALIT ena 43% fam kandida, pli gran pursantaz ki tu parti. E nu ena 46% travayer manyel parmi nu kandida. Sa osi, nu tusel ki ena sa spesifisite. E nu ena kandida depi laz 23 an ziska 79 an, lavil lakanpayn.

Dan sirkonskripsyon kot ena enn sel kandida LALIT, vot LALIT

avan, e apre swazir lot 2 kandida ki finn inplike dan travay dan kartye. Pu eleksyon zeneral, bizin vot 3 pu biltin valid. Kot ena 3 kandida LALIT, vot blok 3 kandida LALIT.

LALIT lor Youtube

Si u ena akse a koneksyon internet, ena enn seri 25 video klip dan chanel "Lalit Mauritius". U ena zis pu tip "Lalit Mauritius" lor sayt Youtube, lerla u pu gayn chanel LALIT. Nu ena osi koleksyon video klip disponib lor DVD pu dimunn ki pena fasilite internet.

Si u ule donn kudme dan kanpayn LALIT, u kapav kontakte nu lor nimeron swivan:

Alain Ah Vee lor 208 5551.

LALIST KANDIDA LALIT

No. 1 - GRNW, & Port Louis West

Roland Boussac, *manb LALIT, militan sindikal.*

Lindsey Collen, *manb LALIT, ekrivin.*

Sarah Jane Naraina, *manb LALIT, kontroler bis.*

No. 2 - Port Louis South & Central

Georges Herchenroder, *manb LALIT, militan sindikal.*

No. 3 - Port Louis Maritime & East

Anne-Marie Joly, *manb LALIT, Muvman Liberasyon Fam.*

No. 4 - Port Louis North & Montagne Longue

Sergio Monple: *kandida LALIT plizir fwa, travayer sosyal.*

No. 5 - Pamplémousses & Triolet

Kisna Kistnasamy, *manb LALIT, MLF.*

No. 6 - Grand Bay & Poudre D'Or

Elvis Franco Onno, *manb LALIT, zardinye.*

No. 7 - Piton & Riviere du Rempart

Alain Ah-Vee, *manb LALIT, Ledikasyon pu Travayer*

No. 8 - Quartier Militaire & Moka

Roland Fozoo, *manb LALIT, manb fondater JUSTICE.*

Rada Kistnasamy, *manb LALIT, Ledikasyon pu Travayer.*

Alain Moorgen, *manb LALIT, aktif dan kartye.*

No. 9 - Flacq & Bon Accueil

Shradanand Lilldharry, *sarpantye, lider lagrev DWC.*

No. 10 - Montagne Blanche & GRSE

Seetresen Murday, *manb LALIT, elektrisyin.*

No. 11 - Vieux Grand Port & Rose-Belle

Sonia Dick, *dan kanpayn kont Kart Idantite biometrik.*

Pushpa Lallah, *manb LALIT, fondater muvman Playgroup.*

Guilliana Sabine, *kandida LALIT 2005, mama 3 zanfan.*

No. 12 - Mahebourg & Plaine Magnien

M.Anne Corinne Phillipe, *manb LALIT, Muvman Lakaz.*

No. 13 - Riv. des Anguilles & Souillac

Cindy Clelie, *Manb LALIT, Muvman Liberasyon Fam.*

No. 14 - Savanne & Black River

Laval Yves, *manb LALIT, mason.*

No. 15 - La Caverne & Phoenix

J.Marie Carolin, *manb LALIT, kanpayn kont Kart Idantite.*

No. 16 - Vacoas & Floreal

Martine Mavisa, *manb LALIT, mama 7 zanfan, dan PTA.*

No. 17 - Curepipe & Midlands

Rajni Lallah, *manb LALIT, Muvman Liberasyon Fam.*

No. 18 - Belle-Rose & Quatre Bornes

Ram Seegobin, *manb LALIT, medsin par profesyon.*

No. 19 - Stanley & Rose-Hill

Christian Batour, *manb LALIT, travay sofer, metye kordonye.*

No. 20 - Beau Bassin & Petite Riviere

Ricardo Durhone, *manb Lalit, menizye, li sintir nwar zido.*

Shabeela Kalla, *manb LALIT, Muvman Liberasyon Fam.*

Ahmad Tallybally, *manb LALIT, travayer sosyal.*

KUDME U KAPAV DONE:

INFORM U FAMI, KAMARAD, KOLEG TRAVAY ki ena LALIT dan tu sirkonskripsyon.

DID ZOT "VOT LALIT AVAN!"



KIFER VOT LALIT

Depi 2 semenn ena lafis partu dan Moris pu anons partisipasyon LALIT dan eleksyon ki pe vini le 10 Desam. Bann lafis la dir: “*Bizin LALIT dan Parlman! Ler finn vini pu vot LALIT.*”

Kumansman Oktob, LALIT ti premye parti pu rann piblik so Program. Sa program la li reprezentant enn veritab alternativ pu amenn sanzman ki nesaser zordi dan Repiblik Moris. Nu program li pa enn lalist mezir, li pa enn seri slogan vid ek vag.

Buku dimunn konn konba ki nu pe amene an permanans depi lontan lor enn seri tem kuma:

- ◆ Nesesite enn nuvo kalite lekonomi ki kapav garanti lanplwa stab, sekirite alimanter atraver diversifikasyon agrikol, reform propriete later.
- ◆ *Itilizasyon lang maternel dan ledikasyon ek mem dan Parlman.*
- ◆ Emansipasyon fam.
- ◆ *Kont nuvo kart idantite obligatwar ek lanprint tu dimunn stoke par Guvernman.*
- ◆ Pu dekolonizasyon Chagos, fermtir baz militer lor Diego, drwa pu Chagosyen returne.
- ◆ *Pu lozman kuma enn drwa.*
- ◆ Pu eliminasyon tu laspe kominal dan sistem elektoral.

Tu sa bann lalit la nu finn amene andeor kanpayn elektoral, andeor Parlman. Nu konsyan ki

sa bann lalit la pu avanse pli vit si ena sutyen elektoral pu LALIT, si ena prezans LALIT dan Parlman, si ena enn lavwa dan Parlman ki koz dan lintere lamas dimunn ki bizin travay pu viv, ki pe truv lavi deplizanpli difisil.



Ki swa ena dan eleksyon?

Laplpar kandida ek parti ki ena dan sa 2 gro Lalyans la, zot tu finn deza dan Parlman, dan Guvernman, dan Lopoziyon. Zot tu finn deza ansam, lerla separe, sanz parti; me zot pa finn reprezentant sa lavwa ki nesaser pu defann drwa ek lintere klas travayer ek dimunn mizer: kifer aster zot pu fer sa? Malgre tu zot promes, zot pu kontiyn reprezentant lintere patrona. Dan Lalyans PT-MMM, ena Sithanen ki ti impoz losterite kan li ti Minis Finans, ena Ashok Jugnauth ki finn deza perdi so syez depite aköz frod elektoral, ena Bérenger ki pe

menas travayer transpor ek disik kan zot pe reklam zot drwa. Me sirtu ena Ramgoolam ek Bérenger ki zot priorite se ki manyer pu partaz puvwar ant zot mem. Zot pe propoz enn nuvo striktir puvwar danzere ki pu diminye rol sa Parlman ki elektora pu swazir dan eleksyon.

Lalyans Lepep finn vini ek enn lalist mezir populist ek demagogik: me zot pena enn program ki reprezentant enn alternativ a politik Travayis dernye 9 an.

Bann lezot parti ki pu prezan dan eleksyon pena enn program koeran pu amenn veritab sanzman, zot pena enn bilan lalit permanan lor tu size inportan.

Alor enn vot pu LALIT dan eleksyon ki pe vini, li reprezentant sa veritab sanzman ki lamas dimunn pe atann, pe swete. Pu ena kandida LALIT dan tu sirkonskripsyon, ek 3 kandida dan 4 sirkonskripsyon.

*Ram Seegobin
pu LALIT, 12 Novam, 2014.*

VOT LALIT AVAN!

Leve boner le 10 Desam, al vot LALIT. Rapel oblize vot 3 kandida pu u biltin valid. Nu modord se, vot 3 LALIT kot ena 3, e kot ena enn sel, rod ankor 2 lezot ki u fer konfyans.